

春

秋

戰

國

史

研究文獻叢刊

— 6 —

(全十六冊)

賈貴榮 宋志英 輯

國家圖書館出版社



春秋戰國史

研究文獻叢刊

— 6 —

賈貴榮 宋志英、輯

國家圖書館出版社

(清)顧棟高撰

春秋大事表五十卷附錄一卷輿圖一卷

(卷一至卷二)

清乾隆十二年(一七四七)錫山顧氏刻本

第六冊目錄

春秋大事表五十卷附錄一卷與圖一卷(卷一至卷二) (清)顧林高撰

方苞序	一
蔣汾功序	三
楊繩武序	五
楊椿序	一三
華希閔	二三
總序	二四
凡例	三〇
綱領	四一

目錄	五九
姓氏	七八
偶筆	八一
附錄	一二三
輿圖	一五五
卷一(時令表)	二八七
卷二(朔閏表)	三五五

近世治經者有二患或未嘗一步諸經之樊前儒之說罕經于目而自作主張以爲心得不知皆膚學舊說前賢已辨而紕之矣或據拾陳言少變其辭氣而漫無所發明吾子寄示春秋大事表凡漢唐宋元人之書皆博覽而慎取之其辨古事論古人實能盡物理即乎人心此僕所以許爲之序而不辭也而負諾責以至於今則有說焉鼎安溪李文貞公周易通論初成屬余序之愚自忖于易概乎未有所明覺虛爲讚美之言無質幹可附以立也高淳張翼歎少與余共治春秋及書成以道遠難致要言他日必爲之序今僕治儀禮九易稿而未能盡通若舍已所務究切李張之書則力不能給後二故人所屬而先新知之請則心不能安故南歸後新安程起生晨夕相見而所著易通至今未序也若天幸儀禮之

業得終李張二書旣序當次第及之太倉顧玉亭亦言有詒釋古
書數種欲寄余訂正聞其身近已淹忽歐公所云勤一世以盡心
於文字洵可悲也不識其書已成否吾子與父故宜問其家人餘
不宣苞頓首

古今善言春秋者莫如孟子其言孔子繼前聖而爲治也頻舉春秋非以春秋大於諸經也使夫子得位行道周易自可贊詩書自可刪而制作禮樂更不待言矣獨於春秋可無作所謂吾身親見之也邪說暴行之禍極於亂賊春秋明天子之事以正之二帝三王之統絕於桓文春秋紹王者之迹以維之顧兩君在莊僖之世於二百四十餘年中曾未及乎四之一而概以桓文之事何也春秋之運以桓文而開春秋之作以治桓文爲要治之奈何如其所事而詳書之俾是非功罪咸自見焉乃所以治之也世無禹湯文武則桓文爲救世之人宜乎聖心有深嘉樂與者然亦卽爲代興之人而王迹於焉永熄矣此又聖人所深憂也迄乎獲麟去霸業逾遠又思其次而不可得矣故言乎桓文而始中終皆舉之也汾

少肄業左氏於經有若望洋而首以春王正月爲疑後檢朱子語類亦云爾乃其言春秋也較諸他經不啻什伯中之一二又始終謂爲不可曉不敢問蒙益藉口自慰不復問津矣顧子復初奮乎千百世之後創成大事表若干其書上蟠下際茹古涵今於我所獨而非立異也於衆有稽而不苟同也遠紹旁搜囊括萬有而一出於心所自得用以承朱子未逮之志而大肆力焉厥功偉矣尚不鄙余而虛衷下問且以叙請余何敢辭抑昌黎有言譽盛德者入耳而不煩又奚多事喋喋爲聊以平日所講習於孟子者指次春秋義例或庶幾乎管窺之一得是用就正於復初復初如以爲然即以是弁諸首可乎乾隆戊辰臘月望前二日毘陵全學弟蔣汾功

梁溪顧震滄先生以所著春秋大事表屬余叙余卒讀喟然歎曰
春秋一書尊王攘夷而重霸尊王故尊周尊周故并親魯攘夷故
擯楚擯楚故并惡吳越尊王攘夷非霸者不可故重霸重霸故子
桓文子桓文而秦穆楚莊雖入于夷事有近于霸則聖人兼有取
焉此春秋之大畧也說春秋者自左公設三傳而外不下百什家
大約自唐以前說經者各據傳則三傳互有主客自唐以後尊經
者多棄傳則三傳漸若贅瘤夫六經皆說理之書而春秋獨為記
事之筆漢藝文志云孔子觀書于太史氏據魯史而作春秋左邱
明述本事而為之傳明夫子不以空言說經也則春秋所重尤在
事而春秋之事當以左氏為斷故胡康侯亦曰事莫備於左氏但
事之大小不同或合數十事而無與重輕或一二事而係天下治

亂盛衰之故若不表而出之則事無所統紀而聖人筆削之指歸終無以昭揭于天下萬古如長夜此先生所以有春秋大事表之作也事莫大于改朔而謂春王正月乃夫子以夏時冠周月又曰改時不改月是無王也是故表時令一本朱子之說主用周正而尊王之義明事莫大於正始隱公元年不書即位魯史舊文也而謂夫子以天自處首黜公以明大法是誣魯也是故表吉禮明十二公書即位不書即位之實以見孔子無擅自黜公之事而親魯之義明自晉啓南陽而周益衰魯賜季氏費而魯益弱此周魯下替之漸兩國大事也是故表王迹拾遺魯政下逮而尊王親魯之義益明春秋以前諸侯無僭王者僭之自楚始歷武文成莊而其焰益熾齊桓崛起首折其角晉文代興復扼其吭名陵受盟城濮

敗績厲悼繼之鄢陵再創蕭魚三駕而楚始不能與晉爭此尤夷
夏進退之機霸業盛衰之界爲春秋第一件大事也是故表晉楚
之交兵爭盟而攘夷之義明重霸之義明時秦亦起自西戎而三
置晉君義聲頗著又嘗從晉以勤王助晉以犄楚事皆近霸楚雖
猾夏然討徵舒之罪許宋鄭之平有霸者之風至於吳晉雖用以
斃楚而柏舉之師以班處宮非霸者事闔廬貪暴夫差荒淫黃池
之爭長未定於越之入吳已亟霸亦不終勾踐之狡詐猜忌已開
戰國之習去春秋之霸遠矣是故表齊晉秦晉晉吳吳楚吳越交
兵爭盟之事而攘夷以重霸之義愈明春秋之初鄭莊有創霸之
心其後宋襄有求霸之事而皆阻於力之不及然兩國當天下之
衝固霸者之所必爭而其從違向背亦霸者所視以爲盛衰者也

故其會盟征伐亦不可以不表其他大如魯衛小如邾莒以及陳許曹蔡之屬亦時有蟻穴之爭螳臂之鬪無與天下大勢則從畧焉春秋時世卿執政故當國之人最重當國得其人則強者以興弱者以存不得其人則強者召亂弱者致敗所謂國以一人興以一人亡者亦大事也如晉中軍楚令尹宋鄭執政皆是也皆不可以不表弑逆大惡滅亡大故災異大變春秋所載不止弑君三十六亡國五十二日食星隕之不可勝計也然世有霸主則亂賊見討遇災而懼存亡繼絕之義猶有行之者霸亡而此義遂熄矣是亦不可以不表郊禘大禮而敢於僭婚喪亦大禮而敢于瀆且亂以至過賓往來治軍寬猛覘國者每以其有禮無禮卜勝負占禍福焉五禮皆大事也不可以不表朔閏表本杜氏之長歷而補其

缺畧疆域表本杜氏之土地名而詳其沿革人物之沿革氏之言
之例然漢書乃一代之史而上及義黃列爲九等高下亦多舛誤
茲則人非春秋時者不列而位置高下亦較核至于黃河之遷徙
不常四裔之種落各異亦考古者所當究心之事兩表尤前人之
所未及也孔子曰吾猶及史之缺文也公羊傳曰所見異辭所聞
異辭所傳聞又異辭則夫史之缺文與其同異大概各因其舊作
史者所不免也而必欲字字生義以爲有意缺之而異同之且謂
聖人之褒貶在是則附會穿鑿之病轉以益滋是故表春秋之缺
文則春秋之真面目自出表三傳之同異而三傳之得失亦自見
矣若夫有表必有序有序必有論有論兼有辨有說更編爲口號
以便人之記誦或古人之所信而辨其誣或古人之所疑而証其

是或貶古人之所褒或褒古人之所貶皆出于震滄之苦心獨斷而實核其事之至當與理之不易者初未嘗以私意參之者也要其大指總不越乎尊王攘夷尊王攘夷總不外乎重霸蓋春秋之時固不可一日而無霸者也孟子無道桓文聖人則思王者不得降而思霸思霸正所以維王迹也邵子皇極經世一書以皇帝王霸配易書詩春秋其深識此意也夫夫學者著書立說有文人之書有學人之書有儒者之書文人之書持論極工而事未必核學人之書紀事極核而理未必正儒者之書說理極正而又不免於迂康侯之傳儒者之書也左公穀三傳學人之書也唐宋以來說經諸家大都文人之書也震滄是書論高而事核兼有文人學人之長理不悖于儒者而又不失之迂讀春秋者可以知所折衷矣

尔受震滄之屬就愚所見而發明之如此

乾隆歲次丁卯嘉平月上浣三日臯里同學弟楊繩武頓首拜撰

